

## Waor of niet waor?

Dick van Bloemendaal, *tekening* Gerard Schut

*Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.*

### *Kaorten bie café Ut Rooie Hert*

's Woensdagsmiddags waren ze altied mit zun vieren in café Ut Rooie Hert an ut klaverjassen, Harmen, Tiemen, Rinus en Willem. Ut ging dur altied aordug fanatiek an toe, want un natte kostte un stuuver en un gewonnen pot verdiende un kwartsje.



Harmen was un heel rustige speuler, die zun eigen nargus druk um maakte. Of hie noen wun of verleur maakte n'um niks uut. Dat kos ok wel, want

hie zat goed bie kas umdat hie z'n sigarenwinkel goed verkocht had en dus niet op un paar centen behoefde te kieken. Tiemen daar en tegen was un zuunige deder die arg op zun centen zat en niet tegen zun verlies kos. Rinus en Willem waren-‘waor of niet waor?’ kerels die nargus wat um gaven, of ze noen wunnen of verleuren maakte ze niks uut. Mit ut kaorten han ze alle vier dur eigen vaste plekje an de tafel. As Tiemen verleuren had, gooide hie van leëigheid zun knip op tafel en zei dan aordug

knap chagreinug “haol dur mar uut wa’k moet betaolen”en ging dan mit un leëe kop naor huus.

Op un dag had Dirk Zwart, de kastelein, un mooie grote spiegel an de muur ‘ehangen, net achter de plek waor Tiemen altied zat. Nao un paor weken mos die spiegel of ‘edekt worre mit un doek umdat Tiemen docht dat de are dree via de spiegel op zun kaorten kossen kieken. Hie had zun eigen langzaam um ‘edreid, naor de spiegel 'ekeken en toen weer trug 'edreid. Toen zei hie machtug kwaod, “dus julie hen me al die tied achter mun kaorten zitten kieken deur die spiegel”. Ut het un hoop trammelant ‘egeuven en op ‘t lest hen ze of’espreuken dat de spiegel in ut vervolg of’edekt zou worre mit un doek. Tiemen was tevree en de are dree han dur veerder geen meute mee dat Dirk , as ze an ut kaorten waren un doek over de spiegel had ‘ehungen.

+++